

93 pertschient da la populaziun nizzegian l'internet

In studi davart l'adiever da l'internet en las chasadas svizras

DA MARTIN CABALZAR / FMR

■ 93 pertschient da la populaziun svizra nizzegian l'internet. Prest tut las personas sut 55 onns, dentant era passa la mesedad da las personas sur 75 onns navigheschan en la rait digitala.

La digitalisaziun dominescha dentant era pli e pli il mund da laver. Quai documentescha in studi fatg dacurt da l'Uffizi federal da statistica davart l'adiever da l'internet en las chasadas svizras.

Ils seniors fan progress marcants

Da las personas tranter 15 e 55 onns navigheschan 95 pertschient di per di en la rait, sco quai che las novissimas cifras da l'Uffizi federal da statistica conferman. L'onn 2024 eran quai anc 84 pertschient en la media, 2029 gia 90 pertschient. Las pli autas frequenzas d'utilisaziun d'internet han ils students: 98 pertschient da las personas cun ina finizion d'in studi terziar èn utilisaders da l'internet, tar las personas ch'han absolvì mo la scolaziun obligatorica èn quai mo 80 pertschient.

Ils pli gronds progress fan dentant ils seniors. En il fratemps nizzegian 88 pertschient da las personas da 65 fin 74 onns l'internet, quai èn 11 pertschient dapli che 2017. Ils seniors sur 75 onns han schizunt augmentà per 13 pertschient ed èn uss per 58 pertschient online. Tenor schlattaina datti sulet en la pli auta categoria da vegliadetgna ina differenza. Tar ils umens sur sessanta mutta la cumpart dals navigaders ad 85 perschient, tar las dunnas dentant mo 73 perschient.

Ferma digitalisaziun dal mund da laver

Las differenzas da generaziun daventan adina pli pitschnas, dentant tar la cumpetenza digitala datti mancanzas signifcantas tar las personas attempadas. Disponan traïs quartas dals giuvenils tranter 15 e 24 onns da cumpetenzas digitalas è quai mo ina terza da las personas tranter 55 e 64 onns e schizunt mo ferm in sisavel tar las personas ch'han dapli che 65 onns.

Quai dastgass er esser d'attribuir a la mancanza da participaziun dals pensiunads a la vita da laver. Tant e tschert. La vita da laver è in'impurtanta funtauna per l'acquist da las cumpetenzas digitalas. Bunamain ina quarta da las personas activas en il process da laver han tenor la retschertga da l'uffizi da statistica l'impressiun che lur laver saja sa midada en



L'adiever da l'internet e da la tecnica digitala progrescha cun ried tar la populaziun svizra.

MAD

il decurs dals ultims 12 mais damai ch'ins haja introduci in nov instrument digital e che la manipulaziun da quel ha anc stù vegnir emprendida.

29 pertschient da las personas interrogadas han tradi ch'ellas dovrían adina dapli temp per acquistar novas cumpetenzas. Quai na vegn dentant betg considerà sco negativ.

Prest mintga quart occupà è da l'avisi ch'ils meds digitals hajan simplifitgà e levgià la collavuraziun cun las collegas ed ils collegas, dentant era cun ils partenaris da fatschenta.

Las raits socialas stagneschan

In'impurtanta sparta da l'utilisaziun da l'internet en la sfera privata è la comunicaziun. 87 pertschient da la populaziun tramettan e retschaivan e-mails, traïs pertschient dapli ch'avant dus onns.

80 pertschient fan adiever dad «Instant Messaging».

77 pertschient tschertgan rauba e servetschs, 73 pertschient novitads, 63 pertschient applitgeschan E-Banking, 64 pertschient guardan films e videos, 55 pertschient consumeschan u copieschan musica. Summa summarum constateschan ins in augment da traïs fin otg pertschient dapi 2017.

Creschida considerablament è la cumpart da conferenzas da video cun 24 puncts da pertschient ed ils cuntegns creads sez u l'arcunada da blogs cun 11 pertschient. Sulet en duas spartas stagnescha l'adiever: Tar las raits socialas che vegnivan anc nizzegiadas avant dus onns cun 49 pertschient e la tschertga da laver e la reclama online ch'è sa sminuida per in pertschient sin 24 pertschient, quai ch'è d'attribuir a la reducziun da la dischoccupaziun.

Mo set pertschient navigheschan betg sin viadi

Creschida marcantamain è encuntercomi la navigaziun mobila: Otg da diesch personas sa collian cun l'internet ordaijer chasa u plaz da laver cun in telefon mobil.

Mo set pertschient da la populaziun inditgeschan ch'els na sajan betg en possess d'in telefon mobil. L'onn 2017 munava questa cumpart anc a 25 pertschient.

Era la durada da l'utilisaziun da l'internet crescha:

Duas terzas da la populaziun creschida èn dapli che tschintg uras per emna en l'internet.

Las personas pli giuvnas e las personas meglier scoladas èn bain pli savens en l'internet, dentant la durada crescha marcantamain en tut las categorias da vegliadetgna, scriva l'Uffizi federal per statistica.